



## MUNYATUL MUSOLLI

(Cita-Cita Orang Yang Bersembahyang)

### 21 KELEBIHAN SEMBAHYANG BERJAMA'AH

Dan demikian lagi, setengah daripada orang memeliharaakan sembahyang dan yang mendirikan baginya, ia mengekalkan dan menyungguhkan atas mengerjakan dia dengan **berjama'ah** (برجاعة) kerana bahawasanya:

1. Orang yang sembahyang berjama'ah itu lebih atas sembahyang seorang dirinya dengan dua puluh tujuh (27) darjat, seperti barang yang datang pada hadits. Maka orang yang memudahkan dengan **laba** (لأ - keuntungan) ini dibangsakan laba pada agama lagi ukhrawi, padahal tiada payah pada menghasilkan dia, dan tiada penat mencapaikan dia, maka adalah orang itu orang yang memudahkan agamanya, dan orang yang tiada menghiraukan dia.
2. Dan lagi, kerana kata setengah ulama', ia fardhu kifayah. Diperang akan orang yang meninggalkan dia.
3. Dan lagi pula kerana memeliharaakan mazhab yang mengatakan orang yang jiran masjid, tiada harus sembahyang melainkan di dalam masjid.
4. Kata setengah ulama', membandingkan sembahyang berjama'ah itu seperti air yang banyak, tiada menajiskan dia kedatangan najis melainkan berubah rasanya, atau warnanya, atau baunya. Bersalahan air yang sedikit, jadi najis dengan kedatangan najis jikalau tiada berubah rasanya atau baunya sekalipun.
5. Dan demikian lagi, syaitan kuat ia atas orang yang sembahyang sendirinya itu, tiada kuat ia atas orang yang sembahyang berjama'ah.
6. Dan lagi, orang yang sembahyang sendirian itu tiada disurat melainkan barang yang **di'aqalkan** (دعقلن) dia. Dan sembahyang di dalam jama'ah itu disuratkan baginya sembahyang yang sempurna jika tiada di'aqalkan.
7. Dan lagi, sembahyang berjama'ah itu tali yang disuruh kita berpegang dengan dia yang di dalam firman Allah ﴿﴾:

وَأَعْتَصِمُوا بِحَبْلِ اللَّهِ جَمِيعًا

“Berpegang kamu sekaliannya dengan tali Allah.”

Maka tiap-tiap orang yang lalai akan dia itu, sesungguhnya sangatlah besar ia lupa akan **mashlahat** (مصلحة) agamanya, dan sedikit gemar ia daripada menyungguhkan pekerjaan akhirat. Maka tiada diketahui orang yang menuntut akan dunia menanggung ia akan penat dan payah ia kerjakan yang berat, berjaga malam dan berpanas ia sehari, manakala hasillah baginya maksudnya suku **sejempol** (سجمل - sedikit) daripada labanya, nescaya lupa ia daripada menanggung akan payah-payah dan dimudahkan segala yang payah-payah, dan membilangkan barang yang tercapai daripada laba dunia yang **fani** (فاني - rosak) itu akan tuannya yang amat besar.

8. Dan barang siapa tiada mengira-ngirakan pekerjaan ini bagi dirinya, bahawa adalah ia pada Allah dibilangkan daripada orang yang munafiq, [bahkan] melainkan nyata ada padanya daripada 'uzur yang mengharuskan meninggalkan berjama'ah pada mashlahat pada agama atau daripada dunianya.
9. Qaul yang mengatakan wajib ambil akan seseorang sembahyang bersama-sama pada rumahnya supaya sejahtera daripada dosanya qaul yang menyatakan wajib atau lepas makruh, dan supaya mencapai dengan pahala jama'ah.
10. Dan hasillah jama'ah itu imam dan satu makmum jikalau dengan anaknya atau isterinya atau gundiknya atau khadamnya. Dan tiap-tiap banyak jama'ah banyak afdhal dan banyak pahalanya, kerana diberi pahala dengan sebilang-bilang orang yang bersama-sama ia sembahyang dengan dia. Dan bertambah labanya suci sembahyangnya istimewa jika adalah imam itu orang yang soleh dan **ahli khair** (أهل الخير) dan **solah** (صلاح).
11. Dan lagi disebut pada beberapa hadits bahawasanya tiap-tiap langkah yang dilangkahkan oleh hamba padanya berjalan menuntut berjama'ah pahala yang amat besar, iaitu disurat sepuluh kebajikan dan dihapuskan sepuluh kejahatan.
12. Dan yang menanti sembahyang kemudian daripada sembahyang itu setengah daripada yang mendatangkan dirinya kepada Allah, umpama ia sembahyang Maghrib kemudian ia duduk menanti sembahyang 'Isya'. Dan yang menanti bagi sembahyang dibilangkan dia pada Allah orang yang sembahyang. Dan orang yang duduk pada tempat sembahyang sentiasa malaikat minta ampunkan baginya dan didoakan dia hingga berhadats atau berkata perkataan yang tiada ta'luq padanya kebajikan.
13. Dan demikian lagi setengah daripada pekerjaan yang dicita-cita akan dia, duduk ia pada sof awal dan memenuhi dia dan meratakan dia, kerana besar fadhilatnya.